

栗香五筆

序

栗香先生所著書曰隨筆者續之至於四而吾友屠敬山序之其指以謂宜芟夷風月之辭栞正傳注之失則託體益尊云余聞而疑之夫伊古以來操奇觚奮刀筆直情凝思選言比事以著書垂後世者豈曰托體以自尊云爾哉夫有所不得已也人事之感也靡窮哀樂之來也亡端故著書者性情有厚薄而托體無尊卑詩三百篇大抵出於閭巷訶謠之作或婦

人女子之所諷歎彼豈自知當爲太史之所採錄被之樂章而聖人取之以爲經哉戰國秦漢九流之師其所著書不過數篇而當時所記瑣言雜事後人編輯並廁其中則皆曰諸子由是觀之又烏所謂殊體楊子雲準聖以作經桓譚猶曰凡人賤近而貴遠親見楊子雲祿位形貌不足以動人故輕其書夫書之輕重固各有時今先生之書觸感而發緣興而作多述近世之事不越酬唱之間忽而陳之信無奇矣若

使更歷時代迨乎久遠則亦耆舊之綜錄文章之淵
林也又何辭章傳注之殊其尊卑哉先生之五筆旣
成屬序於予予不敏以是言復於先生亦以叩敬山
焉光緒二十年甲午十一月南豐劉孚京

序

咸豐丙辰橐筆暨陽與都人士相過從卽耳漉生金
先生名未獲親其言論丰采自是神交者踰三十年
光緒己丑赴補來粵先生適自梧郡監鹺返邂逅適
願若平生歡未幾霖出權永安先生旋亦之赤溪司
馬任昨歲甲午重晤省門需次多閒樂數晨夕因得
盡讀先生之粟香隨筆筆彙四編編各八卷今五筆
八卷又早開雕矣誠蔚然巨觀也夫著書一道視乎

其人之才之學而情性志趣襟抱卽寓於其間先生
吾吳望族當代逸才遊歷四方交盡一世其書首述
祖德誦清芬次則回溯釣遊睠懷耆舊梓桑恭敬曰
篤不忘是至性至情有過人者也至於吉金樂石之
文訓詁考据之學遊履所蒞潤色山川賓轄旣投角
藝朋輩銅琶鐵板如賡玉局之詞酒令詩牌不受金
谷之罰是其志趣所近雅人之深致然也若夫交游
生死之際前塵旣沫絕響斯沈此可爲天下有才人

痛哭者矣先生古歡不渝幽光斯闡自鴻篇鉅製以
逮碎玉零珠無美不收有聞必錄自謂爲抱遺訂墜
之資實符昔人掩骼乳嬰之喻已又若景前朝之亮
節憑弔厓門訪鼓山之忠骸重新祠墓忠言讜論章
疏表其丹忱茹蘗飲冰紀傳煒於彤管凡因文以存
人皆彰志而貞教是又別具胸襟獨舒懷抱纏綿悱
惻曠百世而相感者也不甯惟是夫選言必期於有
用濟變勿局乎常談先生論續桓寬志鬼桂海風土

方物語焉必詳固足以補輶軒之遺備志乘之採而足跡半天下各行省之水陸衝要尤瞭然如指諸掌又在粵西久潯灘諸江來源溯自滇黔桂管五嶺巖崙探其幽險形勝阨塞討論碣鑿亭林顧氏之學不能專美於前焉然此猶域內之觀也方今中外一家非洞悉夷情控馭不得其要領先生高瞻遠矚有經營八表之心濠鏡異族羈入者何年島國名都經行者何地廣徵朝使紀程之什兼引私家談瀛之錄溯

洋教西教之派別知彼族亦相水火則馴伏有其間也紀法夷越南之戰事見我國自固藩籬在禦侮得其人也下至火輪舟車天文算法汽學化學之類靡不辨晰源流指陳窾要窺先生意旨或亦欲究心時局者勿以猾夏爲憂勿以攘夷爲急取彼之長備我之用優而柔焉習而化焉以馴至於富强不難則是書也詎不有裨於經世之遠謨救時之急務也哉第以論詩居多謂出入風雅文人之結習固然正未足

以盡是書耳光緒二十一年乙未仲夏上元劉汝霖

序

粵自書契肇興咸工削簡籤牋斯富取悅繙帙斟酌
謨觴實佃敷夫百氏循覽區宇說山川者九能蒞生
先生穎解天弢機同河注鉤深覩奧運平子之覃思
麗藻邁文仿容齋之隨筆辨周遂啟謀鼎真贗難淆
釋號季子白盤羣疑悉剖常州石刻授寰宇之遺珠
申港墓碑瞻先聖之手蹟單辭隻義證金石則經史
旁通酌古準今昭法戒而治平垂鑒金源貴胄拱翊

乾維赤嵌版輿等諸稗乘毀上方山之淫祀民不能
忘論小池驛之戰功士皆用命游屐所莅古蹟彌彰
石坐千人單椒獨秀洞尋金鼓野鶴飛來鴛水烟波
聽櫓歌之唱晚杉青燈火落帆影於亭前竹垞莊荒
呂蒙城古入新豐之市猶聞酒香品中冷之泉獨饒
雋味弔真孃於虎阜淒涼舊徑薜蘿上莫愁之湖亭
消受六朝金粉晴川厯厯樹色青葱漢水湯湯琴臺
突兀凡茲勝境悉萃斯編於是緬先哲之遺徽溯鄉

邦之文獻毘陵後起七子于喁比屋聯吟一門風雅
囊存小草竹懶閒吟茗柯懷白之零篇學宛寄雲之
賸稿莫不緝瓊文固播芳藝林化及閨襜兼工琴趣
小令則栖霞最勝慢詞亦浣青所長餘韻流傳新聲
競倚織綃泉底羣誇機杼之工拾翠洲邊自得羽毛
之異他若忠孝崎行貞烈清操瑣事零星並驅烟墨
遺聞摭撫盡付汗青此又補夢溪之筆談助茶餘之
客話也鳴珂屢承手畢謬訂神交未接塵談常通鷗

東坡志林
月
訊識焦桐於爨下賞音久託平鍾期秘鴻寶於枕中
作序終慙夫元宴光緒二十有四年歲在戊戌春三
月初吉嘉興張鳴珂

栗香五筆卷一

五筆緣起

栗香室叢書編例

虎邱

眞孃墓詩

靜圃

金鼓洞

鴛鴦湖

落帆亭

石鼓文集字

曝書亭

呂蒙城

新豐鎮

中泠泉亭

遂啟謚鼎

雨花臺劉園

莫愁湖

武昌省城

夫婦刲臂療母

黃鶴樓聯

大別漢口誤稱

晴川閣

琴臺

詩鐘

湖廣督署楹聯

南菁書院

戚公祠

介軒日記並詩

論援浙書

輓聯類記六條

粟香五筆卷一

江陰 金武祥 澹生

五筆緣起

余纂粟香隨筆八卷續成二筆三筆四筆各八卷都三十二卷始於光緒辛巳迄於辛卯凡十年每得兩卷卽付剞劂以本非著述聊備遺忘偶一覆視疵累不可勝言又復艱於改補嗣是銜恤里居攷獻徵文積久成卷游蹤所至凡載之日記者亦摘錄數條以

誌鴻爪各標題目用便檢尋取盈篇帙無當大雅述
之於首卽以爲自序云

栗香室叢書編例

余厯年輯刻栗香室叢書凡四十餘種搜殘存佚類
多鄉先輩及先世遺稿又以邇年自著數種廨入
常以爲疑近寄俞曲園太史審定覆書云誦清詠駿
見家學之淵源考獻徵文示詞林之根柢鳳氏瑣記
各種有裨經義江上孤忠諸錄足補史闕末附江陰

藝文赤溪雜志皆自著書也楚詞章句附九思之篇
玉臺新詠存孝穆之作古人固有此例矣因編總目
以缺增輯

虎邱

虎邱一名海涌山在蘇州閶門外下臨山塘羣山環
拱獅子峯對峙俗有獅子回頭望虎邱之說邱不甚
高而單椒獨秀上有千人石爲生公說法處旁有劍
池一泓澄清兩崖陡削高處有橋跨之洵稱奇勝曩

時列肆連塵囂雜殊甚吾鄉遂有假虎邱之稱庚申
燬於兵燹轉覺耳目一清山靈之眞面見矣山半憨
泉爲梁時憨憨尊者所鑿近於其旁建湧翠山莊有
問泉亭送青窻靈瀾精舍諸處洪文卿侍郎聯云問
獅峯底事回頭想頑石能靈不獨甘泉通法力爲虎
阜別開生面看遠山如畫翻憑劫火洗塵囂下聯實
先得我心

眞孃墓詩

題壁詩鮮有佳者余游虎邱在眞孃墓見邗江王景
沂題一律云一春夢雨了無痕鬢影釵光斷碣存過
眼鶯花名士淚撩人蜂蝶美人魂埋香歲久情天老
鬪草游歸淡月昏莫問蘼蕪舊芳徑吳孃蕉悴不堪
論頗跌蕩有致惜第四句重人字蓋隨時口占未經
推敲者也

靜圃

吳下園林近日頗盛然靡麗紛華不免有塵俗氣余

由吳門放櫂虞山訪趙惠甫直刺在其靜圃盤桓兩
日覺水光山色翳障悉空亭榭池臺亦疏爽有致蓋
惠甫歸田十有八年購吳氏廢園寬廣將二十畝重
事剏造手植梧柳已大逾十圍圖史金石羅列左右
清福殊不易得也自撰門聯云專意典籍左太沖宜
春之里自栽草木李義山永樂所居又客座聯云花
木土石水泉離世樂道者宜有誦讀論議教誨大雅
宏達之所羣金眉生贈聯云闢藝苑文林以爲三徑

擅春華秋實無負百城宗湘文贈聯云儘樓臺池館
抵妙手成圖誰辦此五世遺經萬言作賦視將相王
侯如飄風過眼纔消得四圍烟水一榻雲山錄數聯
以見梗概

惠甫昔奉 特旨訪召參曾文正軍事作宦十餘年
急流勇退一意著述近年與余書問往還無虛月嘗
以其園旁別屋招余結鄰今夏遽歸道山故輓以聯
云盛名動君相談笑綸巾溯從冀北歸田高臥早成

傳世業清福占園林叨陪尊酒猶憶道南推宅相招
怕讀隔年書蓋紀其實也

金鼓洞

西湖自庚申兵燹後雖厯年增飾而名勝多有未能
脩復者如金鼓洞極幽勝亞于紫雲余由紫雲洞而
往曲折高下叢莽塞途里餘始至舊有道院極荒陋
然規模猶可想見此院岩上架屋下臨澗壑洞旁有
泉澄澈甘芳冬夏不竭壁間舊有野鶴飛來四字體

勢飛動傳爲回道人用鶴翎所書今則遍覓不得豈
石刻亦遭劫火耶蓋金鼓洞在西湖最晚見前人題
詩者甚少朱竹垞以後稍稍稱之見於集中如杭堇
浦厲樊榭諸公是已 先祖游此曾有詩云空山少
行迹野鶴忽飛來此境仙人識何年古洞開瓦間蒼
鼠竄樹底禿鶺鴒一擊雲霄去凌空首不回又 先
祖有大石佛寺七古一首今石佛已毀并無從脩復
矣

鴛鴦湖

余游杭州歸道出嘉興沈芷磷大令招同吳璉軒孝廉游烟雨樓樓在鴛鴦湖中搆於五代時錢元璪明萬厯中復築層臺曰釣鼈磯又以湖爲放生池立碑曰魚樂國旁有凝碧浮玉兩亭乾隆時翠華六幸御筆題繪復於熱河之山莊青蓮島仿式爲之咸豐庚申燬於兵燹亂後厯年興築雖魏樓未復而堂廡亭榭俱備皆善化許雪門太守經營之太守在

郡十八年頗有政聲亦好風雅詩畫聯額極多余獨
愛其一聯云讀竹垞歌兩岸漁莊蠡舍記梅村曲扇
舟楊柳桃花最爲穩切又郭意誠京卿贈許聯云小
別西湖恰來此地看烟雨相逢南浦同上高樓話水
雲意誠湘中舊識余來自西湖與璫軒芷磷譙集情
景與此聯相似故并錄之

落帆亭

嘉興古爲樵李讀朱竹垞鴛鴦湖櫂歌名勝不可勝

數庚申亂後遺跡蕩然惟烟雨樓首先建復近十年
復建落帆亭在杉青閘旁相傳肇自南宋櫂歌所謂
秋涇極望水平堤厯厯杉青古閘西夜半嘔啞柔櫓
撥亭前燈火落帆齊是也余偕璉軒芷磷由南湖放
舟至北郭游焉疊石奇峭略仿獅子林特具體而微
耳石之上有小亭登亭茗話適風雨大作萬木怒號
近浦遙汀舟航競泊落帆之景又妙於風雨時遇之
不必夜半燈火時也

石鼓文集字

璉軒名受福爲少村中丞哲嗣淡於仕進以著述自娛精篆隸工詞章和余冰泉唱和詩並撰贈聯語云王元禮官各一集洪容齋筆累五編有小種字林集篆石印本摘石鼓文多至百數十聯摭拾諸家考釋兼用假借詮注下方爲錄尤佳者四言云佳天爲大如日方中有四時樂爲眾人師師字見辭鐘鼎曾孫來止君子樂之孫字見辭鐘鼎天花六出殿水一絳殿古池字用張甚說絲借作

鸞

師子搏兔獸人獻麋

獻字从辭用敏

大異時好不求人憐

五言云雷禽鳴旭日旂魚樂深淵

旭字今已半泐

禽魚有真

樂鹿豕可同旂敬事馭六馬安車旂四方

馭字用鄭夾深說

大賢樂其樂王孫歸不歸虎拜祝天子鹿鳴享賢人

拜字享字从鄭夾深說

湯王祝魚罔孔子嘉雉鳴

湯字見日下舊聞

花

朝多旂子柳陰佳小舟

佳借作維

有人來不速謂我何所

求魚旂自可樂禽鳴不如歸君平用小道求仲真高

人小从施說

眞字見辭鐘鼎高从辭釋

六言云吳公子好古樂孫真

人多需方處事作求敬簡逢人各道平安蜀樂不如

眾樂求我可勿求人

蜀借作獨

黃流可以用享彤弓迺為

好賢

迺從辭釋

避道自絲出處古賢安有異同

避嚴鐵橋謂是吾字

絲借作關

有所求如不及方其可之謂時古樹高出戶

右好花喜放日中

戶字見辭鐘鼎喜字放字亦參辭

安樂可師栗里

優游好泛楊舟

優游從錢說

陸天游寫漁樂王子安工駢

辭

陸從潘釋駢從馬氏釋

七言云為人師有如時雨安汝止即

是樂天六朝人多工辭翰四公子佳秀平遠

秀借作編遠借

作辭章奔放若天馬寫作工秀如來禽淵淵其淵謂

天道日日又日即王猷華雨來時游魚樂柳陰深處

鳴禽多王右丞辭多古趣吳道子藝奪天工趣从鄭說奪

字今已八言云方盈不盈有如流水時止則止是謂

樂天康樂和親是爲王道左右奔走大有賢人王道

樹人朝多君子公田雨我時樂太平朝从鄭釋獻可於朝

嘉樂君子逢時則駕大有同人北平射虎孫陽求馬

西母駕車王子驂鸞鸞經通作鸞今借用處爲小草

母从天一閣本

出爲大樹用以霑雨鳴以朝陽

霑借作霖

華放水流自有

旨趨禽鳴魚樂各具天真

旨从馬釋

曝書亭

朱竹垞曝書亭在梅里荷花池之陽嘉慶元年阮文達督學兩浙重建有我是前身朱竹垞再來重建曝書亭之句踰三十年秀水令呂筠莊重脩道光庚戌嘉興令朱述之復脩之粵寇之變幸逃劫火然半已割售他姓同治丙寅吳和甫學使贖而新之訪求先

生嫡裔一人已爲酒家傭爲置田以資薪水曝書亭
所藏書籍圖畫散佚殆盡最後有鬻及先生授兩孫
分書手跡者馬小眉洵賦詩云烟雲過眼忍重論蠹
紙依稀手可捫舊業只餘三徑在當時奚啻一經存
能令遺墨歸藏弄幾見良田到子孫直得兼金爭購
取百年猶可想清門馬澹于汾題八聲甘州詞云只
叢殘一紙抵家藏遺墨閱星霜悵蕭然貧宦無多負
郭書券分將大好文孫競爽耐得淡齏黃想見垞南

北瓦屋斜陽 并少金留諛墓但閉門苦守絮語家
常溯蓬山舊事回首太茫茫幸當年青蓮交契有後
昆隻字寶琳瑯還驚喜風花寒食未替椒漿

朱竹垞先生遺兩孫析產券云竹垞老人雖會通籍
父子止知讀書不知生產因而家計蕭然但有瘠田
荒地八十四畝零今年已衰邁會同親族分撥付桂
孫稻孫分管辦糧收息至於文恪公祭田原係公產
下徐蕩續置蕩七畝并荒地三分均存老人處辦糧

分給管墳人飯米孫等須要安貧守分回憶老人析
箸時田無半畝屋無寸椽今存產雖薄若能勤儉亦
可少供饘粥勿以祖父無所遺致生怨尤倘老人餘
年再有所置另行續析此字康熙四十一年四月日
竹垞老人書錄之以見清德高風其所以訓子孫者
惟云止知讀書又云安貧守分與古人所謂有舊田
廬令子孫勤力其中足供衣食者若合符節

呂蒙城

丹陽之東有呂城鎮孫吳時呂蒙築城久廢鎮則宋
雍熙四年置按史記呂后本紀封呂忿爲呂城侯正
義云在鄧州南陽縣西呂尙先祖封此特名偶同耳
太平寰宇記呂蒙城在蒲圻縣西北呂蒙所築屬鮎
澗鎮並見水經注元和志此則地在湖北又一統志
懷甯縣北二十里有呂蒙城桐城縣東南亦有呂蒙
城此皆在今安慶府元余闕入大龍山詩翠積樅江
潁崇冠呂蒙城 國初董樵同安江上詩春風公瑾

墓細雨呂蒙城此皆指安慶之呂蒙城言之若詠丹陽之呂蒙者薩雁門之呂公城下葛仙家洞府春深鎖暮霞王阮亭之雞鳴呂城鎮日出市橋東朱竹垞之潮迴黃歇浦江入呂蒙城蔣心餘之路入呂蒙城寒溪淦淦清吳穀人之潮通丁義瀆草長呂蒙城皆是也

袁簡齋新齊諧言呂蒙爲呂城土地神五十里內無闕廟或云今鎮中祀文武帝君者數處且近鎮卽有

專祠宋金壇劉漫塘題呂公廟詩云呂公遺壘枕高岡
落日西風草木荒王氣懸知南國在不妨北面仰
冠裳蓋宋代有孱陵侯祠今祠久不存余至呂城城
隍廟見神稱顯靈侯又見壁間光緒九年丹陽縣示
有云本孱陵之舊館邑志堪徵云云蓋卽呂祠改建
者豈因城隍而誤爲土地耶特關廟之有無尙未細
訪耳

呂城土神北祀顏將軍良南祀郭汾陽王子儀未知

始於何時紀曉嵐灤陽續錄呂城二土神祠一爲郭汾陽王一爲袁紹部將顏良祈禱頗有靈驗所屬境周十五里不置關廟有一縣令不信值顏祠社會故令伶人演三國志雜劇狂風忽起捲蘆棚苫蓋至空中斗擲而下伶人有死者所屬十五里內瘟疫大作令亦大病云云此與新齊諧所記呂祠事相類未必實有之惟相傳顏祠與城隍廟不演三國志戲余謂祀顏將軍於呂城又以汾陽之尊貴屈爲土神均不

可解余于七月二十八日至鎮土人以是日爲汾陽王生日香火頗盛云

陳介亭學博有呂城郭汾陽祠詩云旣非桐鄉祀浙西儼屈周公列白屋富貴壽考叢一身故應顓蒙走簡劄黃少鐵大令有呂城顏將軍祠詩云聰明正直民所喜馨香何必限疆理死公非髯髯非蒙各自爲君爲國耳紛紛靈怪語稗史豈有恩讐報無已二君呂城人所言皆可徵信也

新豐鎮

新豐鎮在丹徒縣南四十五里陸游記曰李太白詩
南國新豐酒東山小妓歌又唐人詩再入新豐市猶
聞舊酒香皆謂此非長安之新豐也一作辛豐有辛
王廟宋紹興七年立丹徒志楊大成記略曰韓國趙
侯辛君諱翼字大鵬灌陽人也避秦入閩以家財求
客爲韓報仇後居毘陵葬辛塘之南至隋立祠於南
岡之東宋眞宗始封王號紹興七年遷祀於此云云

是又一張子房惜未聞博浪椎耳六國之亡何忠於韓者之多也

中泠泉亭

泊鎮江游北固山上摩雲亭登多景樓石帆樓皆近年重建而壁間舊刻吳琚天下第一江山六大字

皆爲

梁武帝書筆勢相稱翁覃溪嘗縮臨之越日遊金山東憩

妙高臺西入留玉閣觀東坡玉帶又至禪堂辨周遂

啟謨鼎乃下山南行過渡里許經郭璞墓

方輿輿勝云金山前

有三島號石渚俗稱郭璞墓明知其誤以訛傳訛也
瑛隨其母與昆俱葬江陰縣北近海所謂北阜烈烈
巨海混混累累三游新枊中冷泉亭回廊高閣兩橋
墳惟母與昆是也

通焉揚子江心水爲天下第一泉本在江中數十年
來沙漲成洲近因劃沙分畝始見泉眼遂濬一池以
石圍之縱橫方數丈憑欄而玩鬢沸四溢得此亭益
足增勝矣京口山水之勝皆顯豁呈露此在西南隅
獨闢幽境江隄環匝風帆隱現品泉間話別有超然
塵俗之想兒子章試白下過此題詩云故鄉名勝推

京口第一江山第一泉其全首未能相稱姑記游蹟而已

張又新水記揚子江有中冷水爲天下點茶第一名勝志中冷亦曰南冷余以爲舊稱三冷以三石簾分之石簾皆巖石隱出水面若木李德裕所辨則爲中

之 簾然卽雲根島亦曰石簾

冷陸鴻漸所辨則爲南冷其北冷第指江言非更有北冷泉也東坡詩中冷南畔石盤陀蔡肇詩中冷之西古石排皆可爲證今所創泉亭在俗所稱郭璞墓

南當爲南冷泉矣亭前石池汲水極便旣無銅瓶長
綆之難可除大雄殿井水之冒據傳者云汲此泉滿
一甌可投五十錢不溢惠山泉則可投三十錢他水
投二十錢未有不溢者余未之試也

遂啟謨鼎

遂啟謨鼎於道光壬寅二月陝西岐山縣城北榮湯
村史姓耕地出之爲漢陽葉東卿所得定爲周宣王
時物梅伯言許海秋有文記之甲辰五月置之金山

以配焦山之周世惠鼎世惠一作無專有篆文十二行百三

十四言刻腹內牆居中後晤方子聽大令以爲惟遂
啟謨作廟叔寶尊彝九字爲原刻文餘則骨董家增
字求售耳

雨花臺劉園

七月杪游莫愁湖元武湖皆菰荷最盛之所是時採
買蓮實而敗葉枯莖已有蕭颯之感中秋後一日出
聚寶門游劉氏園則園內外數池荷花尙數百朵且

多含蕊未放者紅衣翠蓋將與桂菊爭豔何相離不
十里而天時地氣不同如此此園在雨花臺北麓爲
宋末劉叔向墓舊址趙子昂有過墓七律詩明宋潛
溪題爲劉公墩者是也今園有竹石池館之勝墩亦
補立碑碣並覆以亭有柘枰題聯云一帶梅岡都入
畫此間松雪舊題詩

莫愁湖

容齋三筆有兩莫愁之辨謂周美成詞莫愁艇子曾

繫專咏金陵爲誤江甯志云不知得名何時又云湖
之狀正如楚澤悲風眉紋雙結不知誰何愛而疑似
之然湖名相沿已久金陵亦較著於郢州固不必再
爲置辨楹聯如李松雲云一種湖光比西子千秋樂
府唱南朝最爲渾切詩如王阮亭云潮落秦淮春復
秋莫愁好作石城游年來愁與春潮滿不信湖名尙
莫愁袁子才云淡淡春山小小舟一湖水氣濕粧樓
六朝南北風流甚天子無愁妓莫愁陳雲伯云芙蓉

香澹蓼花秋彷彿嬋娟載月游兩字莫愁空記取六
朝山色向人愁何子貞云烟水荒寒不可收昔年曾
作冶春游湖山自有佳時節兒女寬心且莫愁各有
神韻余最愛誦之

今之言莫愁者以爲非伎實節婦此則有關風教者
王壬秋有聯并跋語云同治十年重新莫愁湖亭余
按樂府詞莫愁以河中人嫁盧氏亦北方名族也石
城艇子說者歧異蓋麗質嘉名流傳詞賦如宋子齊

姜之比不宜儕於蘇小真孌也爲村引以諗好事聯
云莫輕他北地胭脂看畫艇初來江南兒女生顏色
儘消受六朝金粉只青山無恙春時桃李又芳菲

莫愁湖之勝棋樓李維楨記只言徐九公子以謝元
自比弇州諸園記亦未言太祖賭棋然今人豔稱之
中山王像與莫愁小影並傳近時楹聯如薛慰農云
山溫水膩風月常存幾人打槳清游倩小妓新絃翻
一曲齊梁樂府局冷棋枯英雄安在有客登樓閒眺

東坡志林 卷一
仰宗臣遺像壓當年常沐勳名孫澄之云賭墅付傳
聞歎青史成堆千古河山棋一局爭墩笑多事看畫
梁依舊半湖烟雨燕雙飛

武昌省城

湖北武昌省城跨江而包山自三國吳時始因山爲
城城大而形圓中橫亘以山山之脈起城東而達於
西南以高觀山黃鵠山爲界高觀山俗名蛇山卽黃
鵠之支阜岡巒起伏其下多湖城市山林尤有濠濮

閒想余癸巳仲秋寓全皖會館東傍墾子湖卽滋陽
湖植蓮數十頃風來水面殘荷送香遙望東郭外洪
山疊翠塔影凌雲皆可寫入圖畫

夫婦割臂療母

余寓居全皖會館主凌仲璫刺史時仲璫方悼亡其
子竺臣當母病時偕婦割臂肉和藥以進故張孝達
督部輓聯云橘枳弗能良劇憐佳婦佳兒臂肉難充
王母藥蘋蘩誰共采空使一絃一柱淚珠愁寫玉溪

詞陳右銘廉訪聯云齊眉得慧業文人那堪觸目遺
徽哀絃忽奏孤飛曲刳臂有亢宗令子況是同心嘉
耦擎刃偕調續命湯筮臣名培有至性嗜學能文所
至未可量也

黃鶴樓聯

黃鶴樓重建於癸酉不數年復燬於火今樓之後僅
存仙棗亭數處皆祀呂仙賣卜占相者雜居之楹聯
亦極多記吾郡袁柳溪大令上聯云跨鶴想高蹤誰

知玉笛吹殘更有仙人飛劍過跋云黃鶴樓代有仙
蹟傳誌備詳惟洞賓均指純陽尙有疏漏按王氏箋
記康熙年間嘗降乩於此去世傳飛劍斬黃龍乃宋
散仙顏洞賓非呂也俗演戲白牡丹亦顏事今人多
誤以爲純陽余按金石存佚考云樓本因山得名南
齊書謂仙人子安乘鶴過此而圖經則曰費禕述異
記又云荀瓌唐閻伯理黃鶴樓記兩載之傳疑也
伯理作記魏萬程行書李陽冰
篆額碑已佚文見文苑英華
元末明初始歸之呂岳

而回道人遂雄據是山矣云云今袁聯復有顏洞賓之說神仙之事亦辨所不必辨耳

大別漢口誤稱

黃鵠磯與魯山隔江相望魯山卽古翼際山俗呼龜山謂與蛇山相配此俗習相沿之稱不足辨惟謂爲古之大別山則甚誤其誤始於唐國朝汪容甫代畢秋帆撰黃鶴樓銘琴臺銘皆沿之光緒九年善後局圖說尙爲大別山又今之漢口非古之漢口古漢口應在今漢口東下四五十里今漢口實古夏水之

口其洲謂之夏州亦謂之夏汭皆見於左傳近人著述多有詳論之者

晴川閣

黃鶴樓已燬隔江對峙者晴川閣巍然獨存居江漢二水之間高凌翼際中有聯云山勢西分巫峽雨江流東壓海門潮頗能狀其雄勝

琴臺

由晴川閣而下繞行翼際山麓約三四里訪古琴臺

蓋在漢陽郡城之北矣層軒累榭一邱隆然下臨月
湖廣十餘里枯荷老柳含烟弄颺登臺啜茗惜無七
弦一鼓秋興也按汪容甫伯牙事考引呂氏春秋本
味篇伯牙鼓琴鍾子期聽之高誘注云伯氏牙名或
作雅鍾氏期名子通稱悉楚人也又精通篇云鍾子
期夜聞擊磬者而悲高誘注云鍾子期楚人鍾儀之
族汪又引史記秦策韓非子知伯牙爲楚懷王頃襄
王時人而辨列子湯問之誤余以爲戰國至今已閱

千數百年漢上伯牙遺蹟方志無稽汪亦僅考其事
所謂靈蹤所寄奚事刻舟勝地寫心諒符元賞是矣
善乎宋芷灣詩云噫嘻乎伯牙之琴何以忽在高山
之高忽在流水之深不傳此曲愁入心噫嘻乎子期
知音何以知在高山之高知在流水之深古無文字
直至今是耶非耶相逢在此萬古高山千秋流水壁
上題詩吾去矣語極超妙是耶非耶尤得咏懷古蹟

神解

詩鐘

近時詩鐘之戲以絕不相類之題成七言偶語一聯
謂之分詠格又有限二字分置兩句在第一字爲鳳
頂第二字爲鳬頸或曰燕領第三字爲鳶肩第四字
爲蜂腰第五字爲鶴膝第六字爲鷺脰第七字爲雁
足或曰魚尾在武昌時文酒之會極盛楊叔嶠陳伯
嚴梁星海鄒沅帆汪穰卿屠敬山皆治具招飲譚仲
脩方子聽楊醒吾何詩孫先後來集者數十人競爲

詩鐘凡數百聯典雅工麗尤極自然惜未彙錄余成
鳳頂漢陽云漢水方城尋舊蹟陽春白雪有高歌鳬
頸神武云爾神可鑒昭明德我武維揚集大勳鳶肩
錄牽云參軍錄事宦情薄

用東坡送路都曹詩
序事見容齋三筆

織女

牽牛別意深蜂腰平合云鏡清砥平遵大道珠聯璧
合慶良時鶴膝強禮云中庸可守強哉矯文獻能存
禮足徵鷺脰孫士云南荒尉佗抱孫樂東越錢鏐納
土來雁足筆朱云傳家雅有文兼筆炫世常嫌紫奪

朱存之以誌一時雅集

湖廣督署楹聯

湖廣督署新易楹聯均極雄麗茲摘其切定兩湖不能移置他處者錄之 江漢水東流舸艦黃龍節府

上游尊柱石尙書天北斗觚棱金爵泰堦中夜炳台垣 盛時禮樂入歌謠家頌禹功戶承周化重鎮疆輿資控馭河流巴雪天接秦雲 蘭芷升庭七澤三湘歸節制禾麻被野五風十雨兆豐穰 圭瓚佐中

興江漢萬年周雅勒
名丹修職貢荆衡三品夏書登
世會慶雍熙正當雁輯衡陽虎馴夢澤人文推炳
蔚猶是佩紉香草襟襲雄風志乘見芳型最難忘
雖次佚篇鶴樓初什敦槃思盛事待重續習池置酒
漢上題襟士馬帶雄風記曾蕙圃春蒐釣臺秋宴
山川增壯采爲有郢中高曲江夏奇童佩黻集羣
才看枯柏干霄芭蘭被渚車書歸一統喜荆衡底貢
鄢郢尊王地勢控荆襄紫電軍聲通武庫天文占

翼軫紅雲御氣接中台 千里舳艫聯農隙歲脩江
夏獵三軍裘帶蒞府僚近接峴山游 麗藻擷葩經
周雅臺萊承百祿雄圖恢筆路楚材杞梓蔚千章
軌跡奉睢麟地近周南先被化璇源鍾漢沔士生楚
國易希賢

南菁書院

江陰城中南菁書院光緒初黃漱蘭學使體芳所奏
請創建也取朱子子游祠堂記所云南方之學得其

菁華之義以爲名中有藏書樓祀鄭高密朱紫陽木
主其楹聯云東西漢南北宋儒林道學集大成於二
先生宣聖室中人吾黨未容分兩派十三經廿四史
諸子百家萃總目之萬餘種文宗江上閣斯樓應許
附千秋又樓下客座聯云東林講學以來必有名世
南方豪傑之士于茲爲羣嗣黃爲學使者王益吾司
成先謙刻南菁叢書並 皇朝經解續編亦鉅觀也

戚公祠

明季戚中書勲當江陰被圍自青陽鎮入守城破合宅自焚忠骸聚瘞兩邱遺宅在今學院虹橋之西道光間從伯子晉先生就其宅址創建戚公祠西郊人士入城者多寓此祠旁舍有匯頭村人許月溪於祠屋落成時夢登祠堂見古衣冠者題楹聯上聯云雖死猶生父死忠子死孝妻妾死節奴僕死義赫合門一十七口以殉孤城黃土兩邱埋白骨下聯醒而忘之僅記後兩句云歷勝朝二百餘年而收餘燼清池

半畝照丹心許素非工翰墨者當非自撰託爲神語
時李申耆先生主講暨陽書院欲爲補成而未果另
撰一聯懸之亦僅記上聯云遺老盡矣尙留此一椽
成仁故處今祠遭兵燹僅餘兩邱一池憑弔忠魂爲
之深慨

介軒日記並詩

從伯子晉先生有介軒日記僅存數條有云余前引
漢書刑罰不衷衷卽中知論語刑罰不中讀如字不

必作去聲讀又北史蘇綽傳賞罰不中則民無所措手足是以先王特加戒慎精心悉意推究事源先之以五聽參之以證驗然後隨事加刑輕重皆當則漢以後皆讀平音也 又云兵書不可不讀春秋左氏湯誥牧誓此六經上之兵書蘇明允謂孫吳之書文如金石唐荆川自中會元後留心韜略金文毅致仕後與子弟操演軍事跳躍疾走孰謂文人不當學武願以告今之爲士者

介軒日記又附詩數首高蘭道中云白日不到處綠
陰迷更濃野蟬啼若鳥杉樹直如松澗水去何急嶺
雲行正慵撫綏知乏術慚愧對吾農蓋令江西會昌
時作也

論援浙書

逸亭兄久在湘軍最爲胡文忠所倚重文忠所致手
書凡百數十通近爲排比刊行而兄在軍時條陳軍
事牘稿均已散佚僅存咸豐十年三月十四日所上

文忠舟載陸師雕勦一稿惜當時未用其議爲錄于此稿云本月十三日亥刻接奉十二日鈞諭具悉浙省被圍勢甚岌岌竊維吳越兩省爲東南全局關鍵浙被賊圍全局爲之震動刻卽有兵從陸路馳援亦恐緩不濟急且軍火糧餉就地不能支應則援浙之急宜變計非擣虛不能以制勝非出奇不可以圖功夫逆黨縱多兇悍者不過此數耳彼南岸之賊旣併力於浙且徇逆復渡江而南亦必注意於浙巨股遠

出以犯吾之所必救而圖解金陵之圍池太蕪湖一帶勢必空虛若分一枝勁旅取道南岸輔以水師循江直擣則各路之守賊金陵之老巢未有不震而驚者竄浙之賊勢必回顧此擣虛之兵所以制其要害而握其勝也然此不過牽綴賊勢而尙未能迎頭痛勦也查由華陽鎮至京口水程不及千里由京口至錢塘亦六百餘里若再分一枝勁旅載以民船多帶行糧軍火而以水師護之江流奔駛乘風利不泊之

勢不出四五日可達京口由京口改乘小舟不過七
日夜可達錢塘水陸並進較之僅由陸路馳援遲速
有間且兵出浙之上游蘇松嘉湖可以保全此出奇
之兵所宜急以圖之而計其功也果若是風行雷厲
大軍如天上飛來使賊之氣餒已先爲我奪將皖來
竄賊有畏首畏尾之虞金陵渠魁有入穴傾巢之患
庶江浙可以挽回而大局不致危墜不然江浙事壞
而賊勢益張將挾其全力以分擾南北其禍患不僅

爲東南憂且爲天下憂矣豈獨大江南北處處宜防
鄂之藩籬節節宜固哉或曰征皖之師數僅四萬有
奇合則厚而分則單若分兩枝以救江浙則力有不
逮似也獨不思賊出巨股以竄江浙皖北之賊數月
內必以堅守爲得計我師如進薄堅城將有頓兵之
勢迨至江浙糜爛由是而江右而閩而粵四出蹂躪
補救爲難將有不堪設想者無論征皖之師未必能
遽下堅城即使懷桐舒廬漸次恢復而得殘破之皖

北與失完善之江浙其輕重不待知者而知而況海
運所關財賦所出爲天下安危轉移之機而顧可不
先其所急耶胡文忠覆函云得滌帥復議所慮三事
似均不難其水軍統帶戰船一節厚庵兄雪芹兄亦
可派定其陸師統領一節希庵兄自爲之其總管民
船四百餘號一節并軍火口糧老兄派人爲之云云
是將成而中止也余按此時楚師悉銳圖皖所謂得
殘破之皖北與失完善之江浙利害顯然此計若行

蘇松嘉湖實可保全何至東南糜爛如此殆亦氣運使然歟

輓聯類記六條

先大夫棄養後輓聯佳者甚多茲擇其尤者錄之同鄉公輓云善已旌於朝君子有穀流光積厚歿可祭于社先生之風山高水長赤溪紳民公輓云詔詩禮就養棠封八一齡康強逢吉歌襦袴忽凋椿蔭十萬家感泣銜哀汪憬吾孝廉云有古人風何期魯國靈

光顏乎一旦下知己淚願紀陳留耆舊報之千秋朱
蓉生侍御云鳩杖快南游老子婆婆滄海月鸞驂愴
西逝仙真擁護赤城霞沈芸甫孝廉云詩酒娛情竭
來五嶺烟霞飽供遊眺松喬仙去太息三吳文獻今
又凋零繆筱珊太史云孝友傳家溫恭接物勤儉持
躬闡揚遍祖德鄉賢何止一編殷詔鯉鬻宮侍學幕
府高吟莎廳就養蹤跡歷豫湘皖鄂竭來五嶺愴驂
鸞鄒雋之大令云遺澤在民側聞天語優褒博濟竟

符先德厚克家有子逖聽政聲遠播措施猶啟後人
賢蔣少柳大令云醉鄉風範自清高最難孝友承家
踵義門懿行嘉言積累遺規留百粵哲嗣雲程看遠
大豈惟善施食報卽安節著書立說表彰盛德足千
秋費惕臣孝廉云五福已全符且瞻道德文章君子
顯親孫曾繩武九京如可作爲敘通家累世昊天罔
極易地皆然時惕臣亦居父憂故云

挽聯有用意同而措詞各異者李少荃傅相挽曾忠

襄云易名兼胡左兩公十六字天語殊褒異數更兼
棠棣並傷逝與彭楊一歲三子輩流向盡英才尤
惜竹林賢又易實甫觀察挽忠襄云幹國失三賢去
大司馬少司農纔數月易名足千古合胡文忠左文
襄爲一人

挽大老聯以不事鋪張而簡括出之者爲貴夏聲喬
孝廉挽左文襄云隨節日邊來入幕爲賓一載流光
同過客騎箕天上去出師未捷九原遺恨在和戎張

經甫茂才挽會惠敏云光名父勲能使外人重中國
爲大局慟非徒知己感平生

挽聯之多而佳無過曾文正公之榮哀錄其嗣惠敏
公歿挽聯亦多佳者李少荃傅相云執別一旬何意
遂成千載隔抗棱四裔此才方識九州難許星叔尙
書云語通象譯名重雞林忠信涉波濤不數鑿空開
絕域經武樓船儲才泉府艱難宏幹濟何堪盡瘁甫
中年黃嫩蘭銀臺云有此佳使臣萬國方知天節貴

真堪續名父一官惜以地卿終徐壽蘅侍郎云珪組
嗣前勲壯節縱橫七萬里楹書傳後葉奇文恢拓九
千言俞蔭甫太史云論世務有心得論經術有家傳
參中外以獨成其學爲聖代惜重臣爲師門惜賢子
合公私而一慟斯人金恪士主政云綜中西爲一家
言橫覽九流無此學立功名於萬里外不緣世業足
封侯陳右銘方伯云敷厯聲名二十年恢先世無外
規模絕學號能傳墨子談笑折衝七萬里爲中朝別

開風氣乘槎何處覓張騫黃子壽方伯云海外有功
朝端有望名父之子名世之英楊誠之觀察云爲張
博望易爲富鄭公難力折强鄰拓地遠逾分水嶺通
方言以文治舟師以武時當多事問天何奪濟川才
廣東紳民挽彭剛直聯云誓清大地山河不愛官不
愛命不愛錢歷三朝宏濟艱難於今奏草流傳盡瘁
鞠躬慷慨有如出師表性好五湖烟水又能詩又能
書又能畫徧七省留題翰墨此後甘棠遺澤吉光片

羽感觸應傷墮淚碑頗能括剛直生平

余奉諱里居親友告喪者多撰聯語輓之輓吳晉王
太守云自秣陵別已十七年方期遠宦歸來重與唱
酬同結社由郎署出爲二千石詎料長才未竟空留
著述富藏山輓陸彥備大令云敘誼託重姻何堪羊
石歸來梓里頓驚情話少沈疴經兩載太息雁行中
斷梅山應痛訃書傳

令弟彥頤方任
湖北大冶縣

輓史幹甫大令

云明月證前身頻年襟袞聯懽差幸相從追洛社白

雲共千載此地園林如畫不堪重過慟黃鱸

史以中秋生園

居在白雲溪

輓史冠千觀察云鹽梅著績繡斧巡方憶昔

年風度叨陪握手燕臺一尊酒老子婆娑連枝競爽

有令子星奔往返傷心彭蠡萬重雲

時令嗣恆甫孝廉赴江右迎樞

歸

輓潘應修太守云三筦著循聲方期晚歲歸來九

老成圖追洛社兩年聯宦轍何意典型遽杳一尊話

別記灘江輓趙伯度司馬云星軺戎幄折節羣公迨

看熊軾宣猷自有謳歌留閭嶠閱閱科名振纓累世

更喜象賢繩武早聞聲價重燕臺